



*Kamis, 3 Maret 2022*

**Ogen: Esekiel 29 :17-21**



**ULIH LATIH**



Salah sada hakekat manusia ibas geluhna eme erdahin. Arah erdahin ia nehi tanggungjawabna selaku manusia janah arah erdahin ia nerusken kegeluhen. Kalak situtus erdahin dengen ndalanken singena ate Dibata tentuna ngasup ngenanami ulihna erdahin dengen ngasup ngataken bujur man si masu-masu geluhna. Ulih latih eme asil si ialoken kita arah dahin-dahin silakoken kita. Biasana kenca kita erdahin, ialoken ulihna tentuna enda ngumputi rasa puas, meriah ukur dengen bangga. Terdauhen, kepuasen dikune banci ngenanami ulih latih e sabab megati la kerina kalak ngasup ngenanamisa.

Renungenta paksa enda nuriken maka Dibata mereken sada kehagan man raja Nebukadneser ija Dibata jine mereken Mesir italuken, kerina barang siirampokna bagepe kerina kebayaken Mesir jadi upah latih raja ras tenterana. Sienda jadi erkiteken raja e erdahin guna Tuhan. Amin nai pernah nge Nebukadneser ras tenterana la rulih sitik pe, paksa ia nerang Tirus, la saja takal tenterana megusgus, barana pe seh meculak. Sienda nuduhkan maka kalak si ndalanken sura-sura Dibata pasti rulih. Aminna raja e lao erkiniteken man Tuhan tapi ipake Dibata IA naksiken kuasa Dibata ibas kegeluhen bangsaNa. Enda me siisuruhna isehken Esekiel selaku nabi maka lit pagi paksana bangsa e ibahan Dibata jadi megegeh dengen ngenanami ulih kepatuhenna man Dibata si erkuasa ibas kerina dampar geluhna.

Tangkas siidah maka ulih dahin siilakoken kita ntah pe siperjuangkan la bias kepe erkiteken kebeluhen ras usahata. Lit kepe ije erdahin Dibata ngaturken kerinana. Kuga kita erpengendes dengen ngandalken Tuhan ibas kai pe silakoken kita. Marilah kita ndarami sura-sura Dibata gelah ibas dahin si lakoken kita ije kita enggo erdahin guna Tuhan. Ipasu-pasuNa, sialoken ulih latihta ibas IA nari.

*☞ Dibata me ulu pasu-pasu, Ia mereken ulih latihta*